

08/12/1998

Reformasi diri sendiri lebih mulia

Reformasi Diri

SEBAIK-BAIK perbuatan ialah bermula dengan diri sendiri. Sebelum mencari kesalahan orang lain, eloklah tengok dahulu kesalahan diri kita sendiri. Manalah tahu entah-entah kesalahan kita lebih besar daripada kesalahan orang yang hendak kita perbetulkan. Sebelum menyuruh orang lain berbuat baik, cermin dahulu diri kita, setakat mana kebaikan yang kita buat untuk orang lain. Entah-entah kebaikan yang kita buat tidak sebanyak mana, mungkin juga orang yang hendak kita suruh berbuat baik itu lebih banyak kebaikan atau jasanya kepada orang lain. Begitulah seterusnya sebelum kita mereformasikan orang, suasana atau kepemimpinan sesebuah masyarakat atau negara eloklah kita mereformasikan diri kita sendiri dengan keadaan yang sebenarnya yang menjadi kenyataan.

Sejak Datuk Seri Anwar Ibrahim dipecat daripada Umno dan digugurkan semua jawatan yang disandangnya, bermulalah `reformasi' yang menjadi siulan pengikutnya. Apa benda yang hendak direformasikannya, siapa yang hendak direformasikannya, untuk apa perlunya reformasi itu, adakah reformasi boleh berjaya, semuanya menjadi tanda tanya bagi rakyat yang mahu menggunakan akal untuk berfikir.

Bagi rakyat umum `reformasi' bermaksud perubahan, dan tiap-tiap perubahan tentulah menuju ke hadapan atau mara ke depan, mencapai tahap yang lebih baik dan aspek ekonomi, politik, sosial dan segala-galanya. Adakah `reformasi' yang dilaung-laungkan bertujuan begitu. Kalau kita membaca sejarah perubahan yang dilakukan oleh pemimpin sejak tanah air mencapai kemerdekaan terlalu banyak. Melalui Dasar Ekonomi Baru (DEB) khususnya kemajuan dalam bidang ekonomi, sosial dan infrastruktur meningkat dengan mengakumkan. Kita tidak pernah menjangkakan anak nelayan, anak petani, anak penoreh getah bergelar doktor, jurutera, peguam dan sebagainya. Tetapi ini telah menjadi kenyataan, tidak siapa dapat menafikan.

Penyokong gerakan reformasi sendiri mendapat faedah daripada reformasi yang dijalankan oleh pemimpin yang lalu khususnya Dr Mahathir sendiri.

Apa yang jelas, gerakan reformasi mendapat sokongan Amerika Syarikat. Ini terbukti melalui ucapan Naib Presiden Amerika, Al Gore yang menyatakan sokongannya kepada gerakan reformasi.

Sepatutnya setiap pengikut reformasi mereformasikan diri mereka terlebih dahulu dengan cara berfikir dan bekerja, mempunyai wawasan yang jelas untuk memartabatkan bangsa dan negara, melengkapkan diri dengan pelbagai ilmu dan ketrampilan untuk memimpin negara.